

4.

# HERCULIS CORAZZI

ABBATIS OLIVETANI

A G

Instituti Scientiarum Mathematici  
Praelectio

IN BONONIENSI ARCHIGYMNASIO HABITA

Cum Anno secundo Analyſim publice doceret

*Ex eodem illo ampliffimo Loco, unde olim*

MARCELLUS MALPIGHIUS

R E S

Philosophicas & Medicas

MAGNA HOMINUM CELEBRITATE

TRADEBAT.

Digitized by Google



(III)

Illustris. ac Reverendiss. Praesuli

JO: MARIAE  
LANCISIO

Archiatro Pontificio, & a Secretiori Cubiculo.

HERCULES CORAZZI

F.



*Raeci totius antiquitatis  
sine controversia sapientissimi AEs-  
culapium Medicae artis peritissi-  
mum tanti fecerunt, ut aris etiam  
ac victimis colendum existimave-  
rint:*

A 2

*runt: non quod homines, ut opinor, Deos fieri benefaciendo putarent, sed ut significarent, tantum se prope Medicis debere, quantum Diis. Id mihi nuper in mentem venit, cum ex morbo gravissimo convalescerem; statimque cogitare coepi, quem potissimum hujus aetatis Aesculapium tota Italia deligerem, cui quantum quidem Religionis ratio pateretur, munusculum aliquod voti causa praeberem. Quid autem erat, cur diu dubitarem? Tu scilicet statim occuristi, Praesul amplissime, qui nobis Superum beneficio datus es, ut Sapientissimi Principis vitam custodires, et in aevum longissimum, quantum mortali licet, ingenio et industria produceres. Tu sane inter Medicos tanti es, quanti est inter Principes CLEMENS XI. Pontifex Maximus. Neutro in terris*  
*ma-*

*major, neutro melior. Accipe igitur quidquid est hoc muneris, quod tibi tamquam Medicinae Oraculo acpae-  
ne Numini offero; atque ita acci-  
pe, quemadmodum Numina solent,  
quae nihil exiguum respuunt, si-  
quidem ab eo veniat, a quo magna  
postulari nequeant. Sed cur, in-  
quies, ad Medicum Mathematica?  
Vide, ne tua tibi modestia obsit:  
Novimus enim te non ex vulgo il-  
lo Medicorum esse, qui ex Galeni  
schola numquam exierunt. Nihil  
tibi est in omni artium ac scien-  
tiarum genere ignotum, nihil ex  
Graeca, nihil ex Latina eruditio-  
ne abditum, quod ex editis a te li-  
bris facile judicari potest; sed in  
Mathesi praesertim, unde plurima  
ad Medicam artem adjumenta sunt,  
ita excellis, ut nihil nisi Mathe-  
maticus esse videaris. Itaque ve-  
ren-*

(VI)

*rendum mihi potius fuerit, ne me homines tamquam nimis audacem reprehendant, quod ausim veluti gestum agere coram Roscio. Ut cumque se res habet, erit hoc mei in te obsequii, ornatissime Praesul, ad aeternam hominum memoriam monumentum; quodque mihi unice propositum est, aetas haec, posterique intelligent, me quoque pro virili conatum esse, operamque dedisse, ut gloriae tanti Viri consulerem, et aliquam mihi laudem ex hujus nominis celebritate compararem. Vale.*

Bononiae Prid. Kal. Sext. An. MDCCXVI.

(VII)

# PRAELECTIO



Um multa me ex hoc amplissimo loco dicentem valde perterrent, tum illud maxime, quod ibi dico, ubi doctissimus Marcellus Malpighius incredibili quadam Reipublicae litterariae utilitate et gloria disputavit. Et sane qui fieri potest, ut non magnopere commovear, totisque artubus contremiscam, cum reputo, mihi, cui ne virium quidem fatis sit ad aliena explicanda, ex eo loco esse docendum, ubi ille tam multa praeclarissime invenit, & ad utilitatem totius Orbis explicando propagavit? Hic nempe ille Anatomicen, & Botanicem mirifice auxit; hic plurima historiae addidit naturali; hic  
Medi-

(VIII)

Medicinae partes prope omnes novis inventis amplificavit. Quoties enim intima naturae viscera excussit, & inaudita prius in lucem diemque protulit, quibus non modo mentes hominum rerum, pulcherrimarum cognitione explerentur, sed corpora ipsa tot morbis obnoxia tutius ac facilius curarentur? Quam multa de pulmonibus, quam de renibus multa, de tactus externi organo, de omento, de pinguedine, de hepate, de liene, de utero, de ovis, de formatione pulli, de polypo cordis, de cerebro, de glandulis conglobatis, de plantarum generatione, deque praeterea sexcentis in medium attulit, ita nova, ita mirabilia, ut immortalem sibi, & nobis communione Patriae conjunctis gloriam pepererit! Jamque ejus nominis fama usque adeo toto Orbe percrebuit, ut invidiam omnem superarit, & cum Graecis, Latinisque Philosophis totius  
anti-



antiquitatis sapientissimis comparetur. Nemo ergo me justissimo timore perculsum forte reprehendat: ac miretur potius, siquid omnino dicere audebo, ubi loci dignitas et amplitudo nihil hujusmodi patitur, quale ab ingenio tenuissimi hominis afferri potest. Sed apud quos ago bone Deus! Nonne apud eos, qui magna mihi anno elapso frequentia & humanitate dicenti affuerunt; quique saepe me ad aggredienda strenue majora partim expressa, partim tacita approbatione et impulsu excitarunt? Ita sane. Juvat proinde audere naviter: & quoniam non omnia ab omnibus sunt postulanda singulari Marcelli Malpighii ingenio rerum invenendarum gloriam relinquere, ceterum ejus sinceram et ingenuam disputandi libertatem, quemadmodum Artium Professores decet, imitari. Liceat ergo mihi exemplo tanti Viri de Analyfi infi-

(X)

nite parvorum libere hoc anno differere, eaque probare, & improbare, seu nova, seu vetera, non quibus certis hominibus quorundam scriptorum auctoritati devinctissimis blandiamur, sed quibus maxime adolescentum studiis, & hujus Archigymnasii gloriae consultum putemus. Hoc scilicet consilio de modo agam in praesens, qui mihi videtur ad Disciplinas Mathematicas facillime discendas utilissimus: ac si nimium recedere quibusdam videbor a communi sensu hominum, & inveterata Scholarum consuetudine, illud velim tantisper reputent, numquam fuisse futurum, ut noster ille Malpighius tantam sibi laudem in Philosophica arena compararet, nisi se a veterum Scriptorum servitute vindicasset. Utinam quantum mihi ad ejus imitationem est animi, tantumdem sit aliquando Virium, ut Civium meorum, & carissimae Patriae beneficia  
mo-

monumento aliquo non vulgari, exigua  
saltem ex parte, compensem.

Quoties Philosophiam, praesertim  
vero Physicam mecum ipse perpendo,  
ejusque vicissitudines a primis usque  
Graeciae temporibus memoria repeto,  
toties mirari subit, quonam fato ab A-  
thenarum interitu ad seculum usque  
proxime elapsum nullum ferme ceperit  
incrementum. Nec vero dici potest,  
rerum naturalium scientiam a majoribus  
nostris minime cultam; cum probe scia-  
mus maximum ac paene solum hujus vi-  
tae bonum, habitam esse perpetuo va-  
letudinem; illam autem Medicinae o-  
pe, hoc est rerum Physicarum cogni-  
tione, labefactatam restitui, restitutam-  
que firmari. Diu itaque multumque  
meditatus, ita denique statuo, acriterque  
contendo, jejunos fuisse tamdiu Philo-  
sophos ac infecundos, quod vel pa-  
rum, vel nihil Mathematicis studiis,

(XII)

quae sunt Philosophicis conjunctissima ; intoleranda prorsus ignavia , vacarint. Qua quidem in re etsi illi reprehendendi sunt omnes, qui Philosophiam dividentes, inter praecipuas ejus partes Mathematicas facultates enumerant ; eos tamen praeter ceteros ferre nequeo, qui cum Philosophandi libertatem sibi divinitus concessam abdicaverint , seque totos veluti mancipia Aristoteli tradiderint, ab ejus tamen vestigiis hac in parte recedunt ; nec ea currant, quae ille passim scriptis inservit, & quorum auxilio res praeclarissimas invenit, ac demonstravit . Hujus rei causa , nisi fallor, una est, vel omnium potissima, quod Artis hujus Praeceptores ordine fere, perspecuitate, ac facilitate carentes, Mathematica studia ardua imprimis reddiderint, & adolescentibus paene *adversaria*. Cum enim, siqua in re tradenda in hac certe scientia ordine quo-

quodam opus sit perfectissimo, quo facile possint, serie nexuque concinno res sibi invicem respondentes colligari, & ea, quae sequuntur, ab iis, quae praecedunt, recte deduci; quis non videt, quam longe adolescentum animos antiqui Mathematicarum rerum scriptores avertant, quorum libri ubique involuti nullam certam distributionis legem spectasse videntur. An non enim Euclides omnia profundit, ut forte fortuna inventa sunt? Nonne ceteri totius antiquitatis doctissimi ceteroquin viri res longe diversas sine ullo discrimine miscuerunt, & implicarunt tanta ubique perturbatione et obscuritate, ut mentes hominum invitas potius ad se rapiant, quam suaviter ducant, evincentes illi quidem felicissime quod contendunt, non tamen illustrantes? Praeterquamquod cum omnia improbo labore didicimus, quae ipsi docuerunt, aliena denique nos quasi

quasi rapuisse, & in rem nostram convertisse intelligimus: cumque coacti simus ea concedere omnia, quae ipsi invenerunt, non tamen inveniendi rationem percepimus, historica veluti aliqua, non doctrina Mathematica comparata. Porro quaenam utilitas ex eo genere studii percipi potest, in quo phantasiae magis ac memoriae, quam ingenii opera utimur? Intelligitis profecto, Auditores, hujusmodi contentiones plerumque esse adolescentum, quemadmodum alterae illae, quibus ratio et ingenium exercetur, ad viros, eosque strenuissimos solent pertinere. Equidem non ignoro, eam vulgo circumferri opinionem, ad scientias addiscendas memoria imprimis opus esse felicissima; ideoque in ea plerosque exercenda, seu potius defatiganda ita laborare, ut tum demum sibi ad Artis alicujus fastigium pervenisse videantur, cum prae-

(XV)

praestantissimi Auctoris inventa egregie tenuerint ; Unde fit, ut de memoriae inopia in rebus percipiendis multi querantur, ingenio vero se quisque valere plurimum arbitretur. Ego tamen sic existimo, hanc ipsam, de qua tantopere dolent, memoriae tenuitatem, adjuumento esse vel maximo ad colendum ingenium, & ad eam sibi pariendam facultatem, qua res praeclarissimas ipsi per se inveniant, inventasque ab aliis magna sapientia discutiant. Cum enim memoriae, ingeniique sedes ita sint a natura efformatae ac dispositae ; ut quae plurimum alteri serviunt, alteri plurimum noceant, & unus idemque homo pro aetatum varietate modo magis memoria valeat, modo ingenio ; praeclare fane cum illis agitur, quibus parum opis ad recordandum, sed multum ad intelligendum natura concessit. Ac si exercitatione potissimum insitae nobis  
fa-

facultates perficiuntur, & ad eam perducuntur maturitatem, quam consequi in ipso exordio minime possunt, quid est cur malimus ignobiliorem animi partem excolere, nobiliorem vero illam, qua cogitamus, & cogitando gignimus, desidem et otiosam sine exercitatione relinquere? Ergo non recte sibi consulant qui veterum Geometrarum lucubrationes memoriae mandant, & alienis, ut ita dicam, divitiis delectantur. Qui sibi in hoc litterarum genere laudem non vulgarem proposuere, alio tendant, caveantque religione magna, quasi bidental, commune hoc ceteroquin Mathematicae facultatis incommodum, doctissimum secuti Lamy Benedictinum, qui memoriam, & phantasia plus nimio exercitas vehementissime cum ratione pugnare contendit. Cum enim phantasia juxta mechanicas cerebri conformationes nobis res objiciat, cumque

con-



(XVII)

conformationes istae, non minus, quam vultus, in singulis hominibus variae sint, satis enimvero intelligimus phantasiae species omnium hominum esse diversas, ac saepe inter se pugnantes, nihilque idcirco per eas posse nobis naturaliter demonstrari. Adeo verum est, quod obiter dictum velim, nec phantasia, nec sensus, unde illa fecundatur, ad veritatem cognoscendam divinitus esse concessa. Nec vero quis existimet, me ita desipere, ut putem, corpora, quae a Geometris considerantur, aut colore; aut sapore, aut quapiam simili qualitate praedita esse, quae sensus facile decipiat; imagines tamen aliquas procul dubio efformant; unde fit, ut qui in rebus demonstrandis figurarum opera, uti consueverunt, nullum efficiant rei Mathematicae ratiocinium, nisi per lineas expressum, nihilque verum existiment, nisi quod per figuras oculis obji-

C

cia-

ciatur. Sed nolite quaeso, si veritatem amatis Viri studiosissimi, tantum deferre phantasiae, hoc est facultati, quae per chimeras, & id genus alia vagatur, quo nullo modo intellectus pertingit; quae mutat, ac destruit rerum omnium naturas, quae veras ideas discutit, quae demum, ut omnia paucis complectar, noctem quasi aliquam intellectui offundit. Praeterquamquod nihil est, quod magis animi attentionem avertat, atque alio trahat, quam importuna illa imaginum multitudo, quarum crassa et corporea natura cognitionem obruit veritatis, quae mere spiritalis est, et in sola intellectus ditione posita. Itaque ut ad illam in Mathematicis disciplinis gloriam perveniatis, ad quam mihi videmini tantopere contendere, studio inprimis opus est Metaphysico, cujus ope nihil conemini nisi per ideas spirituales, & ab omni imaginum

num impedimento liberas ac solutas. Etenim vel nullae omnino, vel hujusmodi tantum ideae necessariae sunt, certae, aeternae, immutabiles; nihilque nisi harum adjumento scimus, unde scientia omnis, & veritatis cognitio dependet. Neque vero inficior, arduum esse ac valde laboriosum tironibus praefertim, ideas abstractas contemplari: sed quoniam non alibi quam in nobis ipsis causas quaerimus, ut vocant, occasionales (per quas immutabili quadam lege Deus nobis ad veritatem percipiendam lumina indit) fatis est vim spiritus, quemadmodum nostri appellant, adipisci, quae habitu quodam constat ad facile alacriterque attentionis laborem tolerandum. Haec autem vis quam facili negotio, bone Deus, per ea, quae superius explicuimus, parari potest! praefertim vero si proba accedat studendi ratio, nihilque nisi per clarissi-

mas ideas meditemur. Porro vis spiritus ita se habet in Mathematicis rationibus disquirendis; quemadmodum libertas in ipsa Matheſeos poſſeſſione comparanda. Siquidem per vim Spiritus ad veritatis cognitionem deducimur, per libertatem vero ab errore abducimur, itaque munimur, ut de rebus omnibus dubitantes non niſi manifeſto veritatis lumine ad aſſentiendum rapiamur. Quod ſiquis veſtrum in his Scholis biennium verſatus ea exciperet omnia, quae a tot ſapientiſſimis Profeſſoribus traduntur; identidem vero ſe totum colligens, intra ſe poſita veritatis lumina aſpiceret, tamdiuque ambigeret, donec germana rei lux appareret, omnium merhcule recentium ac veterum Philoſophorum conatus ſuperaret. Plurimum enim intereſt inter Magiſtrum illum internum, qui ipſo rei lumine perſuadet, ac inter externum, qui ad ſuadendum de-

deceptus ipse quoque non raro accedit. Ecce igitur, Auditores, quae sint vobis inprimis acquirenda, vis scilicet spiritus ac libertas; quibus rite commodeque utemini, si primum quidem cujusque Mathematicae propositionis terminos optime percipietis, ideamque clarissimam efformabitis: difficultates deinde ex illa emanantes, vobisque ad disceptandum propositas in tot partes dividetis, quot potissimum expedita solutio postulare videbitur. Id autem faciatis oportet antequam vel Scriptoris, vel Magistri solutionem audieritis, multa vos ipsi per vos conantes, quibus si fieri possit, sine alterius opera ex omnibus angustis evadatis. Quod erit minus profecto arduum, si propositionem in terminos simplicissimos disolvatis: augentesque magnopere attentionem, singulas ejus partes sedulo percurreretis: demum vero rationes universas, quibus illa sol-

vi posse videatur, ad trutinam revocabitis. Tum ad vestrum illum seu Scriptorem, seu Magistrum confugite, ejusque solutionem cum vestra naviter comparete: ac si (quod erat in votis) scopum attigistis, vobismetipsis gratulamini, vestroque illi interno lumini, quo praeunte ac ducente rem optatissimam obtinuistis. Nullum enim si Augustino, hoc est Doctorum maximo, credimus, nullum, inquam, Magistrum habemus nisi unum, *isque intra nos est*. Ceterum ex iis, qui se multa scire, ac docere profitentur; is erit nobis opportunissimus, qui nos ad Magistrum internum consulendum, tamquam ad oraculum certissimum, qualiacumque sese offerant difficultatum genera mittet. *De*  
*universis, inquit, quae intelligimus,*  
*non loquentem, qui personat for-*  
*ris; sed intus ipsi menti praesi-*  
*dentem consulimus veritatem.* Ex  
his,

his, quae haftenus dixi, facile intelligitis Auditores, majoris apud me Analyfim, quam Syntefim effe momenti; nihil ea effe fecundius, aut certius, ejusque praeceptis poffe homines omnia invenire, & fcire omnia, quae alioquin videntur ipfam paene humanam cognitionem excedere. Ad haec cum Mathesis in quantitate verfetur, hoc eft in rebus omnibus, quae minores ac majores effe poffunt, quis non videt noſtram hanc Analyfim veteri Geometriae multo effe praeferendam? Cum enim illa unam ſibi dumtaxat quantitatis ſpeciem proponat, corporum ſcilicet; haec et temporis quantitatem, & gravitatis, & celeritatis, & motus, & ſoni, & rerum, uno verbo omnium perpendit, quae per gradus diſtinguuntur, quaeque plus et minus, ut Philoſophice loquar, admittunt. Quinimo uſque ad infinitum ipſum Analyſis noſtra pertingit; nec coſ-

po-

poribus ullis, aut lineis, aut aliis huiusmodi rebus indiget: quod enim universe de magnitudine disputat, id ipsum ad res spirituales facillime traducitur, in quibus gradus quidam concipiuntur, quaeque idcirco a proportionibus non abhorrent. Itaque spiritus cum nullis obruatur figuris aut lineis, quas veteri usus Geometria omittere nullo modo potest, uno ferme conatu ea percipit omnia, quae per improbos alioquin labores numquam assequeretur. Hinc Analytica studia multo magis mentem attollunt, quam Geometrica, viamque latiore sternunt ad spiritalia et abstracta penetranda. Sed cum multa vos a veteri Geometria ad Analysis debent convertere, tum illud maxime, quod non sine intolerando capitis labore tanta linearum ac figurarum multitudo concipi potest, resque tam multae ac variae pensitari, antequam



quam unde immediata propositionis solutio pendeat cognoscatis. Non desunt in Geometria propositiones, quarum solutio ex magnorum voluminum lectione dependet: quam quidem in rem plus temporis ac laboris impenditur, quam in universam Analysem comparandam. Quid est ergo, ut cum angustissimis terminis hominum vita sit definita, artium ac scientiarum studia temere protrahamus; cumque per Analysem omnia Archimedis, & Apolonii opera paucis diebus completi, atque explicare abunde possimus, in his tamen velimus aetatem integram immorari? Novi sane, quam multos mea haec oratio fortasse alienaverit, qui ita sibi persuadent, veterem Geometriam non unam esse scientiam, sed scientiarum omnium parentem, quod facultates nonnullae ad Geometrica principia referantur.

D

Et

Et quoniam Geometria per figuras, quae imaginationi obijciuntur, homines allicit, multi eam temere Analyfi anteponunt. Quidam etiam in illa sunt haerese, ut putent ea solum vere probari, quae per Geometricas lineas demonstrantur, quod spiritum ipsum, quodammodo afficiant, & quasi sensu aliquo moveant: nec tamen sentiunt lineas, & figuras, tam quae sunt mensurae obnoxiae, quam quae omnis mensurae expertes, non posse sine Analyfeos opera, nisi imperfectissime comparari. Quis porro ibit inficias, exiguum principiorum numerum Analyticae facultatis percipere, et ea, quae ab ipsis vel immediate, vel mediate pendunt ordine colligere, atque ita usque ad rerum altissimarum cognitionem pervenire, multo esse facilius atque expeditius, quam innumera illa Geometriae principia complecti nullo ordine, aut  
nexu

nexu inter se colligata , vel a se invicem dependentia ? Haec certe quidem non recta dici potest studiorum ratio , sed immanis quaedam memoriae vis ac phantasiae , certumque obscurissimi ingenii argumentum . Sit igitur vobis Analysis veluti primum Matheseos elementum , idque pro certo habete , posse vos , posse homines universos infinitas quasdam per eam demonstrationes invenire ; ipsaque problemata facillime solvere , quae sunt olim per longissimas demonstrationes ac molestissimas a veteribus Geometris , quos tantopere admiramini , soluta . Hujus ergo facultatis praecepta hoc anno explicaturus ingenue polliceor , me nihil publice allaturum , quod non diu multumque meditatus communi litterarum bono , vestraeque praesertim utilitati inservire posse existimem . Video enim quam magnam ac difficilem provinciam

(XXVIII)

fufceperim, efficiamque labore, ac diligentia, ut majus in me quidem ingenium, non tamen voluntatem majorem requiratis. Vos certe rogandi non estis, ut dicenti mihi frequentia & humanitate faveatis, quippe et natura ipsa ad haec studiorum genera propendetis, & me potissimum incredibili nescioqua benignitate disputantem excipitis. Nostra haec mutua litterarum officia superi omnes fortunent: faxintque, ut tota Patria de Musis meritissima diu floreat, laboresque nostros ad communem totius Orbis utilitatem quotidie promoveat.

*F I N I S.*




*Vidit Don Franciscus Aloysius Barelli Clericus Regular. Barnabita Sanctissimae Inquisitionis Consultor, & in Metropolitana Ecclesia Poenitentiarius, pro Eminentissimo, & Reverendissimo Domino D. Cardinali Jacobo Boncompagno Archiepiscopo Bononiae, & Principe Sac. Rom. Imp.*

IMPRIMATUR:

*Fr. Thomas Maria Caneti Provicarius Sancti Officii Bononiae.*

B O N O N I A E

MDCCXVI.



Ex Typographia Julii Roffi,  
& Sociorum ad Vexillum  
Rosae prope Studium.  
Superiorum permiffu.